



Zëri i Popullit

ORGAN I KOMITETIT QENDROR TE PPSH

Viti i 43-të i botimit
Nr. 87 (11.457)

E enjte, 11 prill 1985

(BOTIM I POSAÇEM)

**LAVDI VEPRES SE NDRITUR E TE
PAVDEKSHME TE SHOKUT
ENVER HOXHA!**

DHIMBJE E THELLE PER PARTINE E GJITHE POPULLIN SHQIPTAR VDIQ UDHEHEQESI YNE I DASHUR SHOKU ENVER HOXHA

Shokë, komunistë, punëtorë, kooperativistë, intelektualë, gra e të rinj të Shqipërisë, veteranë të luftës e bashkatdhetarë.

Me hidhërim e dhimbje të thellë ju njoftojmë se sot, më 11 prill 1985, ora 2.15, pushoi së rrahuri zemra e Udhëheqësit të dashur e të lavdishëm të Partisë dhe të popullit tonë shokut Enver Hoxha, Sekretar i Parë i Komitetit Qendror të Partisë së Punës të Shqipërisë, Kryetar i Këshillit të Përgjithshëm të Frontit Demokratik të Shqipërisë, Komandant i Përgjithshëm i Forcave të Armatosura të RPS të Shqipërisë.

U nda prej nesh themeluesi i Partisë sonë të lavdishme, organizatori dhe udhëheqësi i Luftës Nacionalçlirimtare e i revolucionit tonë popullor, arkitekti i ndërtimit të Shqipërisë së re socialiste. Mbylli sytë Komandanti heroik i Ushtrisë sonë Nacionalçlirimtare, Ai që krijoi Frontin Demokratik dhe hodhi themelet e Pushtetit Popullor.

Jeta dhe Vepra e Enver Hoxhës, është historia e gjallë e Shqipërisë së sotme. Emri i Tij është lidhur me të gjitha betejat klasore dhe me të gjitha fitoret e Partisë e të popullit shqiptar. Në të gjitha etapet që ka kaluar populli ynë, që nga dita kur u krijua Partia Komuniste e deri më sot, në çdo kohë kur vendoseshin fatet e popullit e të Atdheut, kurdoherë ka qenë i pranishëm mendimi dhe personaliteti i Tij. Në të gjitha momentet kyçe kur zgjidhej rruga që duhej ndjekur e lufta që duhej zhvilluar, udhëheqja dhe drejtimi i Tij kanë qenë vendimtare.

Revolucionar i bindur e patriot i devotshëm, Enver Hoxha ishte i pari ndër komunistët shqiptarë që kuptoi nevojën e madhe historike të krijimit të Partisë Komuniste, të shtabit të vetëm e të aftë për të bashkuar popullin e për ta udhëhequr në luftën për çlirimin e Shqipërisë dhe vendosjen e pushtetit popullor. Atij i takon merita e madhe historike që në momentet më të rënda të pushtimit, të shtypjes fashiste dhe të tradhtisë kombëtare të forcave të vjetra politike, e krijoi këtë shtab, e fuqizoi organizativisht dhe e edukoi ideologjikisht. Ishte Ai në krye të Partisë që në përpjekje të ashpra me armiq të jashtëm e të brendshëm, me oportunistët e fraksionistët, hartoi dhe përpunoi vijën e përgjithshme politike të Luftës Nacionalçlirimtare, që gjeti e përcaktoi rrugën për të arritur në fitoren e 29 Nëntorit 1944.

Nën udhëheqjen e shokut Enver Hoxha Partia realizoi bashkimin e popullit shqiptar në Frontin Nacionalçlirimtar. Ai ishte iniciatori dhe organizatori i Konferencës historike të Pezës. Për herë të parë populli ynë arriti unitetin luftarak mbi bazën e një platforme që shprehte dëshirat dhe aspiratat e vërteta kombëtare të tij. Ishte ky unitet që u bëri ballë forcave të egra të pushtuesve fashistë dhe tradhtarëve të vendit.

Shoku Enver Hoxha është organizatori i drejtpërdrejtë i Ushtrisë Nacionalçlirimtare. Nën komandën e Tij partizanët tanë të lavdishëm luftuan me heroizëm të pasqor brenda dhe jashtë kufijve të Shqipërisë dhe me mbështetjen e forcave patriotike të gjithë popullit çliruan Atdheun tonë të dashur.

Krijimi i Pushtetit Popullor dhe i shtetit të ri shqiptar që lindën në zjarrin e Luftës Nacionalçlirimtare kanë në themelet e tyre mendimin revolucionar dhe veprimtarinë udhëheqëse të shokut Enver Hoxha. Nën kujdesin dhe sipas mësimet të Tij, këshillat popullore u bënë arma e fuqishme e diktaturës së proletariatit, e demokracisë së masave, dhe e ndërtimit socialist.

Shoku Enver Hoxha hartoi e përpunoi programin e transformimeve madhështore dhe të ndërtimit të shoqërisë së re socialiste. Nën udhëheqjen e komunistëve e me shokun Enver në krye u zhvilluan betejat fitimtare për industrializimin, ndërtimi i gjithë atyre veprave monumentale që i dhanë vendit klasën e re punëtorë dhe një bazë të fuqishme për zhvillimin e gjithanshëm ekonomik e shoqëror.

I mbështetur në marksizëm-leninizmin dhe njohës i vuajtjeve e aspiratave shekullore të fshatarësisë sonë patriotike, shoku Enver Hoxha dha orientimet themelore për kolektivizimin e modernizimin e bujqësisë. Në realitetin e sotëm të fshatit kooperativist duket qartë drejtësia e rrugës që përcaktoi Partia.

Shoku Enver Hoxha e udhëhoqi Partinë dhe popullin në realizimin e revolucionit të thellë ideologjik e kulturor që është kryer tek ne. Në qoftë se Shqipëria është sot një vend i përparuar socialist e që zhvillohet me forcat e veta, atdhe i njerëzve të lirë nga çdo shtypje sociale e shpirtërore, vend i demokracisë dhe i mirëqenies për të gjithë, i arsimit dhe kulturës për

masat e gjëra të popullit, kjo i detyrohet luftës që ka bërë populli shqiptar me Partinë e shokun Enver Hoxha në krye.

Nuk ka fushë të aktivitetit politik, ideologjik e shoqëror të Partisë dhe të shtetit tonë ku të mos jetë shprehur mendimi filozofik, forca organizative dhe veprimtaria udhëheqëse e shokut Enver Hoxha. Ai ka përpunuar vijën e përgjithshme të politikës së jashtme dhe qëndrimet e Partisë e të shtetit tonë për çështjet ndërkombëtare. Kjo politikë, kundërshtimi i vendosur i imperializmit amerikan, socialimperializmit sovjetik dhe reaksionit botëror, e përkrahjes së singertë të luftërave revolucionare e çlirimtare të popujve, e solidaritetit me forcat demokratike e antiimperialiste, i ka forcuar pozitën ndërkombëtare të vendit tonë, ka rritur simpatinë e respektin për Shqipërinë socialiste në botë, ka shtuar miqtë e dashamirësit e saj.

Nën udhëheqjen e shokut Enver Hoxha Partia e Punës e Shqipërisë ka zhvilluar një luftë heroike kundër revizionizmit modern. Askush si Ai nuk ka mbrojtur me aq pathos revolucionar, në çdo kohë e në çdo situatë, mësimet e Marksit, Engelsit, Leninit dhe Stalinit nga shtrëmbërimet oportuniste, askush si Ai nuk ka demaskuar politikën dhe veprimtarinë socialimperialiste e socialshoviniste të titistëve, hrushovianëve e renegatëve të tjerë.

Askush si Ai nuk ka luftuar me aq forcë e vendosmëri kundër armiqve të brendshëm të Partisë, grupeve fraksioniste dhe agjentëve të huaj që nga Koçi Xoxe e deri te banda e Mehmet Shehut. Kjo luftë ka qenë shpëtimtare për Partinë, popullin dhe Atdheun tonë.

Shoku Enver Hoxha radhitet ndër ata revolucionarë të shquar që kanë dhënë një kontribut të madh e të veçantë në zhvillimin e mendimit teorik marksist-leninist, që prek të gjitha çështjet e revolucionit dhe të ndërtimit të socializmit. Përgjithësimet e përvojës së luftës çlirimtare dhe të praktikës së ndërtimit të shoqërisë sonë të re, analizat e konkluzionet mbi proceset e zhvillimit të sotëm botëror, janë me një vlerë të madhe ideore, pika orientimi e referimi për veprimtarinë e përditshme revolucionare.

Si internacionalist i vërtetë, Ai ka përkrahur pa u lodhur partitë e reja marksiste-leniniste dhe luftën e tyre revolucionare, u ka qenë kurdoherë afër dhe ka ndjekur me vëmendje luftën për konsolidimin e përparimin e tyre.

Shoku Enver Hoxha është figura më e madhe historike e popullit dhe kombit tonë që do t'u ndrisë me shkëlqim të pashuar rrugën brezave të tashëm dhe të atyre që do të vijnë. Ai do rrojë përjetë i dashur, i nderuar dhe i respektuar në zemrat e gjithë komunistëve dhe të popullit tonë. Me Veprën dhe mësimet e Tij do të jetë kurdoherë pranë tyre për t'i frymëzuar në luftë dhe në punë për të mirën e atdheut dhe të komunizmit. Le të mbetet flamur lufte thirrja e Tij e zjarrtë drejtuar popullit shqiptar me rastin e 40-vjetorit të çlirimit të Atdheut:

«Ta ruajmë si sytë e ballit gjithçka kemi arritur, ta zhvillojmë me konsekuencë më tej, t'u lemë brezave të ardhshëm një Shqipëri kurdoherë e më të fortë, kurdoherë të kuqe, si flakë e pashuar e zemrave dhe idealeve komuniste e partizanë, një Shqipëri që të rrojë e të përparojë në shekuj. Jam i bindur se populli e Partia lart e më lart do ta mbajnë flamurin tonë fitimtar, lart e më lart do ta ngrenë nderin, prestigjin dhe emrin e Shqipërisë socialiste në botë».

Ky është edhe betimi i njëzëshëm që bën sot Partia jonë e Punës dhe mbarë populli shqiptar.

Në këto caste të dhimbjes së thellë për humbjen e Udhëheqësit, shokut e mësuesit tonë të shtrenjtë, Enver Hoxha, le të forcojmë unitetin tonë të çelikut dhe t'i shtrëngojmë edhe më fort radhët rreth Partisë e Komitetit të saj Qendror, le të mobilizojmë edhe më tepër forcat tona për ta bërë Shqipërinë tonë ashtu siç e donte shoku Enver, të fuqishme, të begatë e të përparuar, le të punojmë pa u lodhur siç punoi e luftoi Ai për gjysmë shekulli me radhë për ta ngritur edhe më lart emrin e saj.

Lavdi Vepres së ndritur e të pavdekshme të shokut Enver Hoxha!

**KOMITETI QENDROR I PARTISE SË PUNËS TË SHQIPËRISË
PRESIDIUMI I KUVENDIT POPULLOR I REPUBLIKËS POPULLORE SOCIALISTE TË SHQIPËRISË
KËSHILLI I MINISTRAVE I REPUBLIKËS POPULLORE SOCIALISTE TË SHQIPËRISË
KËSHILLI I PËRGJITHSHËM I FRONTIT DEMOKRATIK TË SHQIPËRISË**

Tiranë, më 11 prill 1985



Vendim mbi krijimin e komisionit për organizimin e varrimit të shokut Enver Hoxha

Komiteti Qendror i Partisë së Punës të Shqipërisë, Presidiumi i Kuvendit Popullor të Republikës Popullore Socialiste të Shqipërisë, Këshilli i Ministrave i Republikës Popullore Socialiste të Shqipërisë, Këshilli i Përgjithshëm i Frontit Demokratik të Shqipërisë

Vendosën:

Të krijohet komisioni për organizimin e varrimit të shokut Enver Hoxha, Udhëheqës i shquar i Partisë dhe i popullit shqiptar, Sekretar i Parë i Komitetit Qendror të Partisë së Punës të Shqipërisë, Kryetar i Këshillit të Përgjithshëm të Frontit Demokratik të Shqipërisë, Komandant i Përgjithshëm i Forcave të Armatosura të Republikës Popullore Socialiste të Shqipërisë, i përbërë nga shokët: Ramiz Alia kryetar, Adil Çarçani, Hajredin Çeliku, Hekuran Isai, Lenka Çuko, Manush Myftiu, Muho Asllani, Pali Miska, Rita Marko, Simon Stefani, Besnik Bektashi, Foto Çami, Llambi Gegprifti, Prokop Murra, Qirjako Mihal, Haki Toska, Shefqet Peçi, Spiro Koleka, Xhafer Spahiu, Pilo Peristeri anëtarë.

Tiranë, më 11 prill 1985

KOMUNIKATE MJEKESORE

Shoku Enver Hoxha vuan që prej vitit 1948 nga sëmundja diabeti dhe sheqerit, e cila me kalimin e kohës shkaktoi dëmtime të përhapura të enëve të gjakut, të zemrës, të veshkave dhe të disa organeve të tjera.

Në vitin 1973, si rrjedhojë e këtyre dëmtimeve, kaloi infarkt miokardi me rregullime të ritmit. Në vitet e mëpasme u zhvillua insuficienca e rëndë e zemrës.

Para një viti pësoi insult iskemik të trurit me hemiparezë kalimtare.

Në mëngjesin e datës 9 prill 1985 bëri ndalim të papritur zemre nga fibrilacioni ventrikular. Megjithatë mjekimin intensiv, ripërsëritja e fibrilacioneve ventrikulare dhe pasojat e parikthyeshme në tru e në veshka shkaktuan vdekjen në ora 02.15 të datës 11 prill 1985.

Ekipi mjekësor:

Profesor Petrit Gaçe, Profesor Fejzi Hoxha, Kandidat i shkencave mjekësore Isuf Kalo, Docent Ylli Popa, Profesor Bajram Preza, Doktor Ahmet Kamberi, Kandidat i shkencave mjekësore Sabit Brokaj, Doktor Arben Fino.

Tiranë, më 11 prill 1985